

## Telerau ac Amodau Gweithiwr Llawrydd Oddi ar yr Awyr

- 1. Contract**
  - 1.1 Ar y gwahanol achlysuron pan fydd BBCSPL am dderbyn gwasanaeth gennych Chi (pob un yn **“Archeb”**), bydd manylion penodol yr Archeb honno wedi’u nodi yn nogfennau archebu BBCSPL a anfonir atoch Chi neu (os yw’n berthnasol) ar y ddalen flaen sydd ynghlwm wrth y telerau ac amodau hyn (y **“Dogfennau Archebu”**).
  - 1.2 Gyda’i gilydd, mae’r Dogfennau Archebu a’r telerau ac amodau hyn yn ffurfio’r Contract rhyngoch Chi a BBCSPL.
  - 1.3 Ar gyfer pob Archeb arall, ystyrir eich bod Chi wedi derbyn y Contract ar y dyddiad rydych Chi’n cadarnhau eich bod yn derbyn y Dogfennau Archebu.
  
- 2. Parti Contractio BBC Studios**
  - 2.1 Yn y telerau ac amodau hyn, mae “BBCSPL” yn is-gwmni o Grŵp y BBC a enwir yn y Dogfennau Archebu, ac mae ei gyfeiriad cofrestredig yn: 1 Television Centre, 101 Wood Lane, London, W12 7FA
  
- 3. Diffiniadau**

Yn y telerau ac amodau hyn:

  - 3.1 Mae **“Chi”** yn golygu’r unigolyn a enwir yn y Dogfennau Archebu. Os ydych Chi o dan 18 oed mae hwn yn Gontract: (a) y mae’r BBC a’ch rhiant/gwarcheidwad Chi yn ymrwymo iddo ar eich rhan Chi; a (b) mae’n amodol ar gael unrhyw drwydded angenrheidiol o dan reoliadau perthnasol sy’n ymwneud â thrwyddedu plant.
  - 3.1 Mae **“Hawliau Eiddo Deallusol”** yn golygu pob hawl sy’n ymwneud â hawlfraint a hawliau cysylltiedig, hawliau o ran dyluniadau, nodau masnach, enwau masnach ac enwau parth, hawliau o ran ewyllys da, diwyg (get-up), neu beri coel (passing-off), hawliau o ran meddalwedd gyfrifiadurol, hawliau cronfa ddata, hawliau o ran gwybodaeth gyfrinachol (gan gynnwys gwybodaeth ymarferol a chyfrinachau masnachu), patentau a hawliau i syniadau gwreiddiol a hawliau perchnogol eraill ym mhob achos mewn unrhyw ran o’r byd a p’un a ydynt wedi’u cofrestru ai peidio a gan gynnwys pob cais ar gyfer adnewyddu neu ymestyn hawliau o’r fath.
  
- 4. Amser yn Hanfodol**
  - 4.1 Pan fydd dyddiad cyflawni yn cael ei nodi mewn unrhyw Archeb, mae’n hanfodol darparu’r gwasanaethau dan sylw yn amserol. Rydych chi’n cytuno i roi gwybod i BBCSPL ar unwaith os byddwch Chi’n dod yn ymwybodol o unrhyw oedi tebygol o ran cyflawni’r gwasanaethau.
  
- 5. Trefnu Gwasanaethau**
  - 5.1 Rydych chi’n cydnabod mai yn ôl disgrisiwn BBCSPL y bydd yn cynnig derbyn gwasanaeth gennych Chi ac nad oes rheidrwydd ar BBCSPL i roi rhesymau dros unrhyw benderfyniad ynghylch ymgysylltiadau.

5.2 Ar ôl i Chi dderbyn Archeb, mae contract ar waith rhyngoch Chi a BBCSPL ar gyfer y gwasanaethau a nodir yn yr Archeb.

5.3 Bydd pob Archeb yn cael ei thrin fel contract ar wahân y gellir ei wahanu ac ni fydd perthynas rhyngoch Chi a BBCSPL yn ystod y cyfnod pan nad ydych Chi wedi cael archeb gan BBCSPL.

5.4 Ni ystyrir y bydd unrhyw beth yn y telerau hyn nac yn nhelerau unrhyw Archeb gyfystyr â pherthynas gyflogaeth rhyngoch Chi a BBCSPL ac ni fydd contract cyflogaeth yn bodoli rhyngoch Chi a BBCSPL ar unrhyw adeg.

5.5 Os bydd BBCSPL yn derbyn gwasanaeth gennych Chi fwy nag unwaith, ni fydd hyn yn rhoi unrhyw hawliau cyfreithiol ac ni fydd yn sefydlu hawl i Archebion pellach neu reolaidd gyda BBCSPL.

## **6. Yr Hawl i Weithio**

6.1 Mae unrhyw Archeb a wneir o dan y telerau hyn yn amodol ar fod gennych Chi hawl i weithio yn y DU, ac ar gynnal yr hawl honno.

## **7. Ffi**

7.1 Wrth ystyried y gwasanaethau a ddarperir, mae BBCSPL yn cytuno i dalu i Chi'r ffi a nodir yn Eich Dogfennau Archebu.

7.2 Dim ond fel y cytunwyd gyda'ch Archebwr neu Gyswllt yn BBCSPL y caniateir taliadau am ddiwrnodau ychwanegol a weithiwyd (os yw'n berthnasol). Oni chytunir fel arall, mae'r ffi a nodir yn Eich Archeb yn hollgynhwysol ac ni fydd taliadau ychwanegol yn ddyledus i Chi e.e. am weithio gyda'r nos neu ar wyl y banc.

7.3 Mae'r broses o dalu'r Ffi yn amodol arnoch Chi yn darparu i BBCSPL yr wybodaeth gyfredol a chywir sydd ei hangen ar BBCSPL i brosesu'r taliad ac i gydymffurfio â'i rwymedigaethau statudol, gan gynnwys eich rhif Yswiriant Gwladol/Nawdd Cymdeithasol Chi, eich enw cyfreithiol Chi a'ch dyddiad geni Chi, ymysg pethau eraill.

7.4 Rhaid i chi dderbyn Eich archeb yn brydlon ar y Porth Taliadau Llawrydd fel y nodir yn Eich Dogfennau Archebu.

7.5 Bydd yr holl daliadau yn cael eu prosesu ar sail cyflogres wythnosol, a byddant yn cael eu gwneud ar ddydd Gwener fel arfer.

7.6 Gall BBCSPL beidio â thalu, neu dalu'n rhannol, os na wnaethoch Chi ddarparu eich gwasanaethau yn unol â'r telerau ac amodau hyn a/neu Eich Dogfennau Archebu, a gall ddiwynnu o'r taliad unrhyw symiau sy'n ddyledus gennych Chi i BBCSPL pryd bynnag yr oedd symiau o'r fath yn ddyledus.

## **8. Amser Gwaith a Gwyliau**

8.1 Rydych Chi'n cytuno, dros gyfnod yr ymgysylltiad o dan y Contract hwn, y byddwch Chi yn gweithio'r cyfryw oriau sy'n angenrheidiol i gyflawni eich rhwymedigaethau Chi o dan y contract hwn. Mae Eich ymgysylltiad yn amodol ar ddarpariaethau Rheoliadau Amser Gwaith 1998 (fel y'u diwygir o bryd i'w gilydd). Rydych Chi drwy hyn yn cydnabod ac yn cytuno y gall eich oriau gwaith Chi fod yn fwy na'r uchafswm oriau gwaith wythnosol yn ôl y gofynion hynny;

ar yr amod fodd bynnag, y gallwch Chi dynnu'n ôl o gytundeb o'r fath drwy roi 3 mis o rybudd ysgrifenedig (neu, os yw'n fyrrach, cyfnod o rybudd ysgrifenedig sy'n cyfateb i gyfnod eich ymgysylltiad Chi) i BBCSPL unrhyw bryd yn ystod yr ymgysylltiad. Byddwch Chi yn cydymffurfio ag unrhyw geisiadau a wneir neu fesurau a osodir i alluogi BBCSPL i fonitro eich amser gwaith Chi a bydd methu â gwneud hynny'n golygu eich bod Chi yn torri'r Contract hwn yn sylweddol.

8.2 Mae gennych chi hawl i 5.6 wythnos o wyliau â thâl ym mhob blwyddyn wyliau (sy'n dechrau ar ddiwrnod cyntaf eich ymgysylltiad Chi o dan y Contract hwn), gan gynnwys gwyliau cyhoeddus a gwyliau banc (gydag "wythnos" yn cael ei chyfrifo drwy gyfeirio at nifer y diwrnodau rydych Chi'n eu gweithio yn ystod eich ymgysylltiad.) Dim ond ar ddyddiadau sydd wedi cael eu cymeradwyo'n ysgrifenedig gan yr Uwch Gynhyrchydd/Golygydd o leiaf 6 wythnos ymlaen llaw y dylech chi gymryd y gwyliau rydych chi wedi'u cronni. Efallai bydd yr Uwch Gynhyrchydd/Golygydd yn gofyn i Chi gymryd gwyliau ar ddiwrnodau penodol. Bydd tâl gwyliau'n cael ei dalu pan fydd y gwyliau'n cael eu cymryd. Ar ddiwedd y Cyfnod, byddwch Chi'n cael eich talu yn lle unrhyw wyliau a gronnwyd yn y flwyddyn wyliau gyfredol ond na chawsant eu cymryd, neu bydd gofyn i Chi ad-dalu BBCSPL am unrhyw wyliau a gymerwyd sy'n fwy na'r hawl a gronnwyd gennych Chi.

## 9. Treuliau

9.1 Oni chytunir yn benodol â BBCSPL, ni fyddwch Chi'n hawlio treuliau ar ben y Ffi. Pan fydd treuliau wedi cael eu cytuno ar gyfer Archeb benodol, mae'n amod cyn i BBCSPL wneud unrhyw daliad i Chi bod y treuliau wedi codi'n rhesymol, yn briodol ac yn angenrheidiol gennych Chi wrth gyflawni'r gwasanaethau, ac nad yw'r treuliau'n fwy na'r hyn y byddai gan gyflogai BBCSPL hawl i'w cael o dan bolisiau perthnasol y BBC, y mae BBCSPL wedi'u mabwysiadu a'ch bod Chi wedi cyflwyno tystiolaeth ategol briodol i BBCSPL o'r treuliau a gafwyd.

9.2 Rhaid hawlio talu ffioedd yn brydlon drwy gydymffurfio â phroses BBCSPL (a fydd yn cael ei hysbysu i Chi), cyn pen 3 wythnos i ddiwedd archeb. Bydd BBCSPL yn talu'r symiau sy'n ddyledus erbyn diwedd y mis sy'n dilyn y mis y gwnaeth y Cyflenwr hawlio'r taliad.

9.3 Gall BBCSPL beidio â thalu, neu dalu'n rhannol, os na ddarparwyd y gwasanaethau yn unol â'r telerau ac amodau hyn a/neu delerau'r Archeb, a gall ddiwynnu o'ch taliad Chi unrhyw symiau sy'n ddyledus gennych i BBCSPL pryd bynnag yr oedd symiau o'r fath yn ddyledus.

## 10. Therfynau Cyllidebol BBCSPL

10.1 Byddwch Chi'n cydymffurfio â therfynau cyllidebol perthnasol BBCSPL (os yw'n berthnasol) sydd wedi cael eu darparu gan BBCSPL. Rydych Chi'n cydnabod os byddwch Chi'n mynd y tu hwnt i gyfyngiadau o'r fath heb gael caniatâd gan BBCSPL ymlaen

llaw, yna ni fydd yn rhaid i BBCSPL eich ad-dalu Chi mewn perthynas ag unrhyw symiau dros derfynau o'r fath.

10.2 Mewn rhai amgylchiadau, efallai y bydd BBCSPL yn gofyn i Chi fel rhan o Archeb i weithredu fel asiant prynu a/neu dalu BBCSPL ar gyfer prynu nwyddau, cyfleusterau neu wasanaethau ar ran BBCSPL. Os felly, bydd yn rhaid cytuno ar unrhyw wariant gyda BBCSPL yn ysgrifenedig cyn prynu a byddwch Chi'n sicrhau eich bod yn cael anfoneb TAW yn enw BBCSPL. Dim ond pan fydd tystiolaeth yn cael ei chyflwyno y bydd hawliadau'n cael eu had-dalu.

## 11. Iechyd

11.1 Rydych Chi'n gwarantu nad ydych Chi'n gwybod am unrhyw gyflwr iechyd a allai effeithio ar eich gallu Chi i ddarparu'r gwasanaethau.

## 12. Cymhwysedd

12.1 Rydych Chi'n tystio eich bod Chi'n gymwys i ddarparu'r gwasanaethau.

12.2 Bydd Eich cymhwysedd yn cynnwys (ond heb fod yn gyfyngedig i) gael y profiad, yr hyfforddiant a/neu'r cymwysterau perthnasol a byddwch Chi'n darparu'r safon ddisgwyliedig o ran sgiliau, gofal a diwydrwydd priodol fel y byddai'n rhesymol i'w ddisgwyl gan unigolyn proffesiynol sy'n ymgymryd â'r rôl (gan gynnwys gweithredu o fewn cyllidebau os yw hyn yn rhan o'r rôl a gwaith cyn ac ôl cynhyrchu ac ailfformatio os yw'n briodol).

12.3 Os nad ydych Chi'n dangos y cymhwysedd hwn, gallai BBCSPL derfynu'r Archeb ar unwaith.

## 13. Cyfnod

13.1 Bydd grym ac effaith y Contract yn dal ar waith yn llawn am y cyfnod a nodwyd yn y Dogfennau Archebu ('y Cyfnod').

13.2 Os bydd rhwymedigaethau wedi eu cyflawni gan unrhyw barti i unrhyw raddau, ystyrir y bydd unrhyw rwymedigaeth o'r fath wedi eu cyflawni yn unol â darpariaeth y Contract hwn ac yn amodol arno i bob diben.

13.3 I osgoi amheuaeth, mae'r rhwymedigaethau o dan gymalau 38 Treth Incwm a Chyfraniadau Yswiriant Gwladol, 39 Didyniadau, 27 Indemniad, 19 Cyfrinachedd, 37 Diogelu Data, 42 Cyfraith Lywodraethol yn ymestyn y tu hwnt i'r cyfnod.

## 14. Ymddygiad Disgwyliedig

14.1 Yn ystod Eich ymgysylltiad, byddwch Chi'n cydymffurfio â Chod Ymddygiad y BBC a Gwerthoedd y BBC sydd wedi cael eu mabwysiadu gan BBCSPL. Byddwch Chi hefyd yn cydymffurfio â'r polisiau a'r canllawiau sy'n berthnasol i'ch ymgysylltiad Chi, sydd ar gael yma: [Polisiau a Chanllawiau](#). Os byddwch chi'n gweld pobl eraill sy'n gweithio yn y BBC yn ymddwyn mewn ffordd nad yw'n cyd-fynd â Chod Ymddygiad y BBC a Gwerthoedd y BBC, gallwch godi hyn yn unol â'r Cod Ymddygiad. Mae'n rhaid bodloni'r safonau ymddygiad hyn, a gallai peidio â gwneud hynny olygu bod y contract hwn wedi cael ei dorri'n sylweddol.

**15. Gwiriadau Cofnod Troseddol**

15.1 Rydych Chi'n cytuno i gael gwiriad DBS neu os ydych chi yn yr Alban, i ymaelodi â chynllun PVG, os yw'r BBC yn credu bod hyn yn briodol.

**16. Pensiwn**

16.1 Mae'r Llywodraeth yn mynnu bod cyflogwyr yn darparu trefniant pensiwn yn y gweithle ar gyfer eu gweithwyr; gelwir hyn yn "gofrestru'n awtomatig am bensiwn" (PAE). Mae BBCSPL wedi dewis NEST (Ymddiriedolaeth Cynilion Cyflogaeth Cenedlaethol) fel ei ddarparwr PAE. Mae BBCSPL yn cadw'r hawl i ddefnyddio darparwr arall ar wahân i NEST o ran PAE unrhyw bryd yn y dyfodol.

16.2 Mae BBCSPL wedi dewis gohirio cofrestru awtomatig am dri mis; felly (cyn belled â'ch bod chi'n bodloni meini prawf penodol o ran eich oed a'ch enillion) byddwch yn cael eich cofrestru â NEST yn awtomatig dri mis ar ôl dechrau archeb unigol yn BBCSPL. Bydd rhagor o fanylion am NEST, a fydd angen i chi gofrestru'n awtomatig, a'r buddion pensiwn sydd ar gael i chi yn ystod eich ymgysylltiad yn cael eu darparu i chi ar ôl i chi ddechrau gweithio i BBCSPL adeg pob archeb. Os byddwch chi'n cael eich cofrestru â NEST yn awtomatig, gallwch chi ddewis optio allan o NEST ond dim ond ar ôl i chi gael eich cofrestru'n awtomatig.

16.3 Hefyd, os oes gennych chi dipyn o gynilion pensiwn eisoes a'ch bod wedi cofrestru ar gyfer statws Gwarchodaeth Benodol neu Warchodaeth Uwch gyda CTheF yn y gorffennol, dylech chi fod yn ymwybodol y gallai ymuno â chynllun pensiwn gyda BBCSPL wneud i chi gollu budd eich Gwarchodaeth Benodol neu Uwch yn y dyfodol. Os ydych chi'n credu y gallai hyn fod yn berthnasol i chi, byddwn ni, BBCSPL, yn argymhell eich bod chi'n gofyn am gyngor ariannol annibynnol ynghylch eich buddion pensiwn a'ch sefyllfa o ran treth.

**17. Statws Cyflogaeth**

17.1 Rydych Chi'n cydnabod eich bod Chi'n "weithiwr" o dan adran 230(3)(b) o Ddeddf Hawliau Cyflogaeth 1996, at ddibenion Rheoliadau Amser Gwaith 1998 a Deddf Isafswm Cyflog Cenedlaethol 1998. At ddibenion adran 83(2) o Ddeddf Cydraddoldeb 2010, rydych Chi wedi ymrwymo i gontract yn bersonol i wneud gwaith.

17.2 Ni fydd unrhyw beth yn y Contract hwn yn eich gwneud Chi yn gyflogai i BBCSPL.

17.3 Nid yw BBCSPL yn atebol am unrhyw daliadau cyflogaeth statudol fel (heb gyfyngiad) tâl dileu swydd sut bynnag y byddai'n codi. Mae gennych Chi hawl i daliadau statudol penodol sy'n daladwy i weithwyr.

17.4 Chi eich hun sy'n gyfrifol am Eich cynlluniau ariannol a'ch cyngor treth eich hun, ac nid yw BBCSPL yn derbyn unrhyw atebolrwydd yn hyn o beth. Cynigir y Contract hwn yng nghyswllt y Gwasanaethau yn unig ac nid mewn unrhyw gyd-destun ehangach, y tybir bod gennych Chi a'ch cynghorwyr wybodaeth amdano.

**18. Absenoldeb oherwydd Salwch**

- 18.1 Os nad ydych Chi'n gallu gweithio ar y dyddiadau a gytunwyd, rhaid i Chi roi gwybod i'r Uwch Gynhyrchydd/Golygydd cyn gynted â phosibl beth yw'r rheswm dros Eich absenoldeb.
- 18.2 Os ydych Chi'n bodloni'r amodau cymhwys a bennwyd gan y gyfraith, bydd gennych Chi hawl i dâl salwch statudol ar y gyfradd bresennol mewn perthynas ag unrhyw gyfnod o absenoldeb salwch yn ystod eich ymgysylltiad Chi, ond ni fydd gennych Chi hawl i unrhyw daliadau eraill gan BBCSPL yn ystod cyfnod o'r fath. At ddibenion tâl salwch statudol, y 3 diwrnod gwaith cyntaf yr ydych Chi'n absennol oherwydd salwch yw "diwrnodau aros" lle nad oes tâl salwch statudol yn daladwy, a'ch "diwrnodau cymwys" fydd Eich diwrnodau gwaith disgwylidig.

**19. Cyfrinachedd**

- 19.1 Ni chewch ac ni fyddwch yn gwneud y canlynol heb ganiatâd ysgrifenedig ymlaen llaw gan BBCSPL:
- (a) Ysgrifennu am BBCSPL neu ei faterion ar gyfer cyhoeddiad neu siarad yn gyhoeddus am hynny; neu
  - (b) Cyhoeddi neu ddatgelu yn fwriadol i unrhyw un o dan unrhyw amgylchiadau, unrhyw gyfrinach neu wybodaeth gyfrinachol sy'n ymwneud â materion busnes BBCSPL, ei gyflenwyr neu ei gwsmeriaid, y byddwch Chi yn dod i wybod amdano drwy Eich archeb gyda BBCSPL; neu
  - (c) Cyhoeddi neu ddosbarthu (gan gynnwys dosbarthu ar-lein sy'n cynnwys, heb gyfyngiad, Facebook, Instagram, TikTok ac X) unrhyw ffotograffau neu ddelweddau fideo y gellir eu tynnu tra byddwch ar safleoedd/lleoliadau BBCSPL.

19.2 Ni fyddwch Chi, ar unrhyw adeg yn ystod Cyfnod y Contract nac ar unrhyw adeg ar ôl ei derfynu, yn datgelu unrhyw wybodaeth gyfrinachol i unrhyw drydydd parti (ac eithrio eich cynghorwyr proffesiynol neu pan fydd yn ofynnol datgelu gwybodaeth yn ôl y gyfraith, corff rheoleiddiol neu lys ag awdurdodaeth gymwys), gan gynnwys telerau cyfrinachol y Contract hwn ac unrhyw wybodaeth sy'n ymwneud â busnes, materion a chyllid BBCSPL neu'r darlledwr comisiynu perthnasol (gan gynnwys allbwn, a gwybodaeth breifat am unigolion y dewch Chi ar ei thraws yn ystod Eich Archeb). Ni fydd y cymal hwn yn cynnwys gwybodaeth sydd ar gael i'r cyhoedd neu a ddaw ar gael i'r cyhoedd wedyn ac eithrio drwy weithred neu anweithred gennych Chi.

19. Nid oes unrhyw beth yn y cymal hwn yn eich atal Chi rhag:
- (a) gwneud datgeliad tâl perthnasol o dan Ddeddf Cydraddoldeb 2010; neu
  - (b) gwneud datgeliad cymwys fel y'i diffinnir gan Ddeddf Datgelu er Lles y Cyhoedd 1998.

**20. Polisiâu'r BBC**

- 20.1 Yn ystod Eich Archeb gyda BBC SPL, rydych Chi'n cadarnhau y byddwch Chi'n cydymffurfio â Pholisi Diogelu'r BBC, y mae BBCSPL wedi ei fabwysiadu.

20.2 Mae BBC SPL yn cadw'r hawl i ddiwygio ei bolisiau, ei ganllawiau a'i weithdrefnau yn unol ag anghenion busnes a/neu ddatblygiadau perthnasol mewn deddfwriaeth neu arferion busnes.

20.3 Os na fyddwch Chi'n cydymffurfio â pholisiau'r BBC, y mae BBCSPL wedi eu mabwysiadu, mae'n bosibl y bydd Eich archeb gyda BBCSPL yn cael ei therfynu.

Dolen i: [Polisiau'r BBC](#).

## **21. Datgan Buddiannau Personol**

21.1 Mae'n rhaid i Chi ddarllen Polisi Datgan Buddiannau Personol BBCSPL.

21.2 Os oes gennych Chi unrhyw fuddiannau personol i'w datgan, mae'n rhaid i Chi lenwi ffurflen Datgan Buddiannau Personol fel y nodir yn Eich Dogfennau Archebu.

## **22. Prynu**

22.1 Os bydd angen i chi brynu nwyddau neu wasanaethau fel rhan o'ch rôl Chi, rydych Chi'n cytuno i gydymffurfio â pholisi caffael y BBC, y mae BBCSPL wedi'i fabwysiadu.

## **23. Gwrth-lwgrwobrwyo**

23.1 Rydych Chi'n cytuno i gydymffurfio â Deddf Llwrwobrwyo 2010 a Pholisi Gwrth-lwgrwobrwyo a Throseddau Ariannol y BBC, y mae BBCSPL wedi'u mabwysiadu ac sydd i'w gweld yma: [Polisiau'r BBC](#)

23.2 Ystyrir eich bod wedi torri'r contract yn sylweddol os byddwch yn torri'r rhwymedigaeth hon, a gall BBCSPL derfynu Eich Archeb.

## **24. Cydymffurfiaeth Olygyddol**

24.1 Rydych Chi'n cytuno i Ganllawiau Golygyddol a chanllawiau cysylltiedig y BBC, y mae BBCSPL wedi'u mabwysiadu, ac yn gweithio'n unol â nhw, ac rydych Chi'n cydnabod bod y rhain yn cael eu hamrywio o bryd i'w gilydd.

24.2 Ystyrir eich bod wedi torri'r contract yn sylweddol os byddwch yn torri'r rhwymedigaeth hon o dan y telerau ac amodau hyn, a gellir terfynu Eich Archeb.

## **25. Iechyd a Diogelwch**

25.1 Rydych Chi'n gyfrifol am gydymffurfio â'r safonau iechyd a diogelwch fel sy'n briodol yn amgylchiadau'r Archeb a byddwch bob amser yn cydymffurfio â rheoliadau diogelwch cyfredol BBCSPL, sydd i'w gweld ar safle [Diogelwch](#) y BBC, ac y mae BBCSPL wedi'u mabwysiadu.

## **26. Yswiriant**

26.1 Os ydych Chi'n creu cynnyrch, rydych Chi'n gyfrifol am drefnu a chynnal yswiriant cynnyrch digonol.

26.2 Os ydych Chi'n darparu offer, rydych Chi'n gyfrifol am yswirio'r offer hwnnw.

26.3 Mae manylion trefniadau Yswiriant perthnasol y BBC (sydd hefyd yn berthnasol i archebion BBCSPL) a allai fod ar gael i Chi (yn amodol ar feini prawf cymhwysedd) wrth weithio i'r BBC o dan y Contract hwn i'w gweld [yma](#) ar Borth Gweithwyr Llawrydd y BBC ar wefan y BBC.

26.4 Mae gofynion yswiriant penodol yn berthnasol i rai rolau. Mae'r rolau hyn yn cynnwys y canlynol, ond heb fod yn gyfyngedig iddynt:

- (a) Arbenigwyr Effeithiau Arbennig a Phyrrotechneg
- (b) Arfogwyr
- (c) Unigolion sy'n cael eu cyflogi'n benodol i ddarparu gwasanaethau diogelwch/amddiffyniad personol neu wasanaethau sy'n ymwneud ag iechyd a diogelwch
- (d) Unigolion sy'n cael eu cyflogi'n benodol i ddarparu gwasanaethau goruchwyllo mynediad â rhaff a deifio sgwba
- (e) Unigolion sy'n darparu a/neu'n goruchwyllo rhyngweithio ag Anifeiliaid Peryglus fel y'u diffinnir o dan y Ddeddf Anifeiliaid Gwyllt Peryglus berthnasol (neu reoliadau sy'n ei disodli)
- (f) Unigolion sy'n darparu gwasanaethau fel Arweinwyr Teithiau
- (g) Unigolion sy'n darparu gwasanaethau meddygol (e.e. Meddygon Ymgynghorol, Meddygon, Parafeddygon, Nyrsys, ac ati)
- (h) Unigolion sy'n cael eu cyflogi fel ymgynghorwyr rheoli.

26.5 Os ydych Chi'n cael eich cyflogi ar gyfer rôl a restrir yn (a) i (f) ac yn cael tâl gros neu'n cael eich cyflogi ar gyfer unrhyw rôl arall lle mae angen yswiriant penodol, byddwch Chi'n trefnu ac yn cynnal Yswiriant Atebolrwydd Cyhoeddus digonol gydag yswiriwr dibynadwy a, lle bo hynny'n berthnasol, Yswiriant Atebolrwydd Cynnyrch a/neu Yswiriant Indemniad Proffesiynol ac fe fydd gan bob un o'r rhain gyfyngiad atebolrwydd o ddim llai na dwy filiwn o bunnoedd sterling (£2,000,000) i bob digwyddiad gyda chwmpas y warchodaeth yn briodol i'r elfennau sydd i'w cyflawni o dan yr Archeb.

26.6 Os derbynir gwasanaeth gennych Chi fel Ymgynghorydd Rheoli, mae lefel sylfaenol yr Yswiriant Indemniad Proffesiynol yn cael ei gostwng i filiwn o bunnoedd sterling (£1,000,000) i bob digwyddiad.

26.7 Gall BBCSPL amrywio gofynion yswiriant o'r fath, a'r mathau o wasanaethau y maent yn berthnasol iddynt, yn ôl ei ddisgresiwn llwyr. Er mwyn osgoi unrhyw amheuaeth, ni fydd y lefelau isaf ar gyfer yswiriant o'r fath yn gyfyngiad ar atebolrwydd o dan yr archeb.

26.8 Ar gais BBCSPL, byddwch Chi'n rhoi copïau o'r polisïau yswiriant a gedwir yn unol â'r telerau hyn a/neu'r rhai a nodir yn y Dogfennau Archebu.

**27. Indemniad**

27.1 Byddwch Chi bob amser yn indemnio BBCSPL yn llawn mewn perthynas ag unrhyw ganlyniadau a allai ddilyn ar ôl i Chi dorri unrhyw rwymedigaethau neu warantau a roddwyd gennych Chi o dan y Contract hwn, yn dilyn Eich gweithredoedd neu anweithredoedd bwriadol neu esgeulus.

27.2 Mae hyn yn cynnwys unrhyw hawliadau a wneir gan drydydd partïon o ganlyniad i weithredoedd neu anweithredoedd gennych Chi, yn ôl y digwydd (gan gynnwys rhai sy'n ymwneud â thorri unrhyw Hawliau Eiddo Deallusol a ddarperir o dan y telerau hyn neu delerau unrhyw archebion, neu a ddefnyddir mewn cysylltiad â nhw)

27.3 Ni fyddwch Chi na BBCSPL yn atebol am unrhyw golledion "canlyniadol" neu "arbennig" neu "anuniongyrchol", colli elw, refeniw a/neu fusnes, arbedion disgwylidig, ym mhob achos, p'un a yw'r partïon yn ystyried hyn wrth ymrwmo i unrhyw Archeb neu beidio, oni nodir hynny'n ffurfiol yn yr Archeb.

27.4 Bydd yr indemniadau a'r rhwymedigaethau a nodir yn y cymal hwn yn goroesi terfynu'r Contract hwn.

**28. Gyrru ar Fusnes BBC Studios**

28.1 Os bydd angen i Chi yrru at ddibenion cyflawni'r gwasanaethau yn ystod Eich archeb gyda BBCSPL (p'un a yw BBCSPL wedi cytuno i dalu ffi am wneud hynny neu beidio), mae'n rhaid i Chi gael datganiad gyrrwyr cyfredol BBCSPL a thrwydded yrru briodol.

28.2 Os byddwch Chi'n darparu cerbyd, bydd yn rhaid cael cymeradwyaeth BBCSPL i ddefnyddio'r cerbyd a bydd yn rhaid cydymffurfio â'r Weithdrefn Cerbydau Modur, y mae BBCSPL wedi'i mabwysiadu (sydd i'w gweld yma: [Polisiâu'r BBC](#)) gan gynnwys y gofyniad eich bod Chi'n dal yswiriant cerbyd modur priodol.

28.3 Byddwch Chi'n cytuno i ddarparu gwybodaeth a dogfennau i BBCSPL, ar gais, i ddangos eich bod yn cydymffurfio â gofynion y BBC.

**29. Offer**

29.1 Os ydych Chi'n defnyddio unrhyw offer yn ystod Eich archeb gyda BBCSPL, byddwch Chi'n cytuno i gydymffurfio â chanllawiau BBCSPL ynglŷn â defnyddio TG ac offer cysylltiedig, gan gynnwys Polisi Defnydd Derbyniol y BBC, y mae BBCSPL wedi'i fabwysiadu.

29.2 Os byddwch Chi'n darparu offer at ddibenion eich gwasanaethau Chi, fe fyddwch Chi'n gyfrifol am y gwaith o ofalu, rheoli, diogelu, yswirio a chynnal a chadw offer o'r fath.

29.3 Efallai y bydd BBCSPL yn darparu man storio ar gyfer unrhyw offer, ond nid oes rheidwydd arno i wneud hynny.

**30. Diogelwch/Mynediad/  
Arolygu**

30.1 Pan ofynnir i chi, rydych Chi'n cytuno i roi dogfennau adnabod dilys i BBCSPL.

30.2 Byddwch Chi'n cael cardiau adnabod neu drwyddedau mynediad gan BBCSPL ac yn eu harddangos tra byddwch Chi ar safleoedd BBCSPL. Byddwch Chi'n dychwelyd y cardiau neu'r trwyddedau hyn i BBCSPL pan fydd yr Archeb yn dod i ben neu'n cael ei therfynu.

30.3 Efallai y bydd BBCSPL yn cynnal archwiliadau diogelwch ar hap gan gynnwys archwilio eich eiddo a'ch cerbyd(au) Chi tra byddwch ar safleoedd BBCSPL.

30.4 Efallai y caniateir mynediad i Chi i safleoedd BBCSPL a chyfleusterau BBCSPL fel rhan o'ch Archeb. Mae BBCSPL yn cadw'r hawl i wrthod mynediad i unrhyw un y mae BBCSPL yn ystyried ei fod yn annerbyniol am unrhyw reswm ar wahân i rwystro'r archeb yn unig.

30.5 Rydych Chi'n cytuno i ganiatáu mynediad i BBCSPL i'ch safle Chi neu i unrhyw safle arall y gallai ofyn yn rhesymol i gael mynediad iddo yn gysylltiedig â chyflawni gwasanaethau.

30.6 Rydych Chi'n cytuno y byddwch Chi'n dychwelyd i BBCSPL ei holl eiddo, o ba bynnag fath, gan gynnwys cardiau adnabod neu drwyddedau mynediad i safleoedd BBCSPL, ni waeth beth fo'r amgylchiadau a arweiniodd at derfynu neu ddod â'r Archeb i ben. Ystyrir bod gan BBCSPL yr holl bwerau ac awdurdod yn ddi-droi'n-ôl i fynd ar eich safle Chi neu i unrhyw safle arall i adfeddiannu a chymryd eitemau o'r fath ac adennill y costau o wneud hynny gennyh Chi.

**31. Didwylledd/gweithgareddau  
allanol/cyhoeddusrwydd**

31.1 Byddwch Chi'n cytuno i weithredu'n ddidwyll bob amser tuag at BBCSPL a'r darlledwr comisiynu perthnasol ac ni fyddwch yn dwyn anfri ar BBCSPL na'r darlledwr comisiynu perthnasol, nac yn cyfeirio at BBCSPL mewn unrhyw ddeunydd hysbysebu na hyrwyddo, nac yn siarad yn gyhoeddus am BBCSPL na'i faterion, heb gael caniatâd gan BBCSPL ymlaen llaw.

**32. Hawliau  
Eiddo Deallusol - pob  
rôl**

32.1 Oni ddarperir yn benodol fel arall ar ei gyfer mewn unrhyw Ddogfennau Archebu neu gytundeb atodol a wneir mewn cysylltiad ag Archeb, bydd yr holl Hawliau Eiddo Deallusol mewn perthynas ag unrhyw waith (gan gynnwys gwaith yn y dyfodol) sy'n cael ei greu gennyh Chi wrth gyflawni eich gwasanaethau Chi gyda BBCSPL, boed hynny wrth gyflawni Eich dyletswyddau ("y Gwaith") ai peidio, yn cael eu breinio yn BBCSPL ac rydych Chi drwy hyn yn neilltuo i BBCSPL yr holl hawliau o'r fath mewn perthynas â'r Gwaith ynghyd â'r holl hawliau cysylltiedig, gan gynnwys mewn perthynas ag unrhyw achosion o dorri'r hawliau hyn.

32.2 Ar gais BBCSPL, byddwch Chi'n gwneud popeth sy'n angenrheidiol neu'n ddymunol i weithredu hawliau BBCSPL o dan y cymal hwn.

32.3 Er mwyn osgoi unrhyw amheuaeth, mae gan BBCSPL yr hawl i olygu, copïo, newid ac addasu'r holl Waith ac rydych Chi'n ildio unrhyw hawliau moesol a allai godi o dan Ddeddf Hawlfraint, Dyluniadau a Phatentau 1988, a phob hawl debyg mewn awdurdodaethau eraill.

32.4 Byddwch Chi'n datgelu'n brydlon i BBCSPL yr holl Waith sy'n cael ei wneud gennych Chi (boed hynny ar eich pen eich hun neu gydag eraill) yn ystod cyfnod unrhyw Archeb sydd gennych Chi gyda BBCSPL.

32.5 Ni fyddwch Chi'n gwneud cais i gofrestru, nac yn gwrthwynebu unrhyw gais gan BBCSPL i gofrestru, unrhyw Waith na Hawliau Eiddo Deallusol eraill BBCSPL. Ni fyddwch Chi'n mynd ati'n fwriadol i wneud unrhyw beth sy'n peryglu cofrestrriad, dilysrwydd neu orfodadwyedd unrhyw Hawliau Eiddo Deallusol BBCSPL, nac i achosi i hynny ddigwydd.

**33. Eiddo  
Deallusol  
Ychwanegol ar gyfer  
Cyfarwyddwyr,  
Cynhyrchwyr a  
Chynhyrchwyr/  
Cyfarwyddwyr Teledu  
a Radio yn unig**

33.1 Mae'r hawliau a roddir o dan 32 uchod yn cynnwys aseiniad gyda gwarant teitl llawn o Hawliau Eiddo Deallusol ym mhob cynnwys a wneir gennych Chi o dan y telerau ac amodau hyn lle rydych Chi'n brif gyfarwyddwr a/neu lle rydych Chi'n cyfrannu at sgriptiau.

33.2 Rydych Chi'n gwarantu mai Chi yw unig berchennog cyfreithiol a llesiannol yr hawliau a neilltuir yn 32 uchod ac nad ydych Chi wedi neilltuo na thrwyddedu ac na fyddwch yn neilltuo nac yn trwyddedu unrhyw un o'r hawliau (ac eithrio'r hawl i gydnabyddiaeth deg sy'n deillio o ddefnyddio hawliau rhentu a benthyg) ac eithrio fel y nodir yn 32 uchod.

**34. Cynhyrchion**

34.1 Os yw cynhyrchion yn cael eu darparu neu eu cynhyrchu gennych Chi, rydych Chi'n gwarantu eu bod yn addas i'r diben y maent yn cael eu cyflenwi ar ei gyfer a, lle bo hynny'n berthnasol, eu bod o ansawdd boddhaol, eu bod wedi'u llunio'n dda, gyda deunydd addas a chadarn, a chryfder digonol, a'u bod wedi cael eu profi cyn eu darparu.

34.2 Byddwch yn sicrhau, ar ran BBCSPL, pob cydsyniad, caniatâd a/neu gliriad angenrheidiol gyda hawliau trydydd parti (gan gynnwys Hawliau Eiddo Deallusol) mewn perthynas â'r cynhyrchion.

34.3 Bydd unrhyw gynnyrch a ddarperir neu a gynhyrchir gennych Chi yn cydymffurfio â'r holl gyfreithiau a rheoliadau a chodau ymddygiad perthnasol cyfredol.

34.4 Bydd y cynnyrch yn cael ei gadw mewn ffordd addas a diogel ar eich menter eich hun nes iddo gael ei ddanfon i BBCSPL.

34.5 Pan fydd BBCSPL yn darganfod, adeg danfon neu gasglu neu ar ôl hynny, nad yw'r cynnyrch/cynhyrchion yn cydymffurfio ag archeb fel y nodir, gall BBCSPL dderbyn neu wrthod y cyfan neu unrhyw ran ohono ac os caiff ei wrthod, gall BBCSPL adennill unrhyw daliadau a wnaed am y cynnyrch a wrthodwyd.

### **35. Cydsyniad ar gyfer recordio/darlledu**

35.1 Rydych Chi'n cytuno, heb ganiatâd pellach, i wneud y canlynol mewn unrhyw ffordd sy'n hysbys nawr neu a ddyfeisir yn y dyfodol:

- (a) recordio unrhyw gyfraniad neu berfformiad o unrhyw fath (boed yn berfformiad at ddibenion Rhan II o Ddeddf Hawlfraint, Dyluniadau a Phatentau 1988 ai peidio, gan gynnwys cyfweiliadau, ond heb fod yn gyfyngedig i hynny) y gallwch Chi eu rhoi ar unrhyw adeg yn ystod cyfnod archeb ar gais BBCSPL mewn unrhyw un o raglenni BBCSPL (p'un a ydynt yn cael eu darlledu ai peidio); a
- (b) atgynhyrchu, darlledu neu roi gwybod fel arall i'r cyhoedd am gofnod o unrhyw gyfraniad neu berfformiad o'r fath neu awdurdodi eraill i wneud hynny ar unrhyw adeg boed hynny yn ystod neu ar ôl terfynu'r archeb.

35.2 Bydd telerau unrhyw berfformiad a roddir y tu allan i ddyletswyddau arferol o dan unrhyw archeb sydd gennych Chi gyda BBCSPL yn cael ei lywodraethu gan y math priodol o gontract sy'n ofynnol gan BBCSPL ar yr adeg dan sylw.

35.3 Rydych Chi'n cytuno i roi i BBCSPL unrhyw a phob cydsyniad angenrheidiol o ran hawliau eiddo mewn perthynas â hawliau perfformwyr o dan Ran II o Ddeddf Hawlfraint, Dyluniadau a Phatentau 1988 fel y'i diwygir neu y'i diweddarir yn y dyfodol, a phob cydsyniad perfformwyr eraill a hawliau eiddo o dan unrhyw gyfraith neu ddeddfwriaeth gyfredol neu yn y dyfodol sydd mewn grym mewn unrhyw ran o'r byd er mwyn galluogi BBCSPL i wneud y defnydd llawnaf o'r perfformiadau.

### **36. Rheolaeth Olygyddol**

36.1 Rydych Chi'n cydnabod bod gan BBCSPL a/neu'r darlledwr comisiynu perthnasol reolaeth olygyddol derfynol ac nad oes yn rhaid i BBCSPL na'r darlledwr comisiynu perthnasol ddarlledu unrhyw raglen rydych Chi wedi darparu gwasanaethau ar ei chyfer.

36.2 Os ydych Chi'n darparu gwasanaethau fel **Cyfarwyddwr, Cynhyrchydd neu Gynhyrchydd/Cyfarwyddwr**, gellir:

- (a) Eich gwahodd, yn amodol ar rybudd rhesymol, i ddarparu gwasanaethau ategol i unrhyw Archebion sydd gennych Chi y tu allan i'r cyfnod Archebu. Bydd BBCSPL yn gwneud pob ymdrech bosibl, yn amodol ar anghenion gweithredol a golygyddol BBCSPL, i drefnu i ddarparu gwasanaethau ategol o'r fath ar amser pan fyddwch Chi ar gael. Os na fyddwch Chi ar gael i ddarparu gwasanaethau o'r fath ar

amser sy'n cyd-fynd â'r anghenion hyn, bydd gan BBCSPL yr hawl i fynnu gwasanaethau o'r fath gan Gyfarwyddwr/Cynhyrchydd/Cynhyrchydd-Cyfarwyddwr arall.

- (b) Rydych Chi'n cydnabod bod y gydnabyddiaeth a nodir yn y Dogfennau Archebu yn ystyried yr amgylchiadau i gyd a'ch bod Chi o'r farn ei fod yn cynnwys cydnabyddiaeth deg mewn perthynas â rhentu eich cyfraniadau Chi.
- (c) Bydd gennych Chi hawl i gael ad-daliad am dreuliau y telwch Chi'n unig amdanynt yn llawn wrth ddarparu Eich gwasanaethau, a bydd yr amodau sy'n ymwneud â threuliau a nodir yng nghymal 9 yn berthnasol.
- (d) Os ydych chi wedi cael eich contractio fel **Cyfarwyddwr Teledu** ar gyfer unrhyw archeb, ar yr amod eich bod Chi (i) yn darparu'r holl wasanaethau sy'n ofynnol o dan unrhyw Archeb(ion) a (ii) ddim yn peidio â chadw at y telerau ac amodau hyn yn sylweddol nac unrhyw delerau yn y Dogfennau Archebu, byddwch Chi'n cael cydnabyddiaeth "Cyfarwyddo" mewn copïau o'r rhaglen a gynhyrchir gan BBCSPL fel cyfarwyddwr y rhaglen, gyda'r safle a'r lleoliad yn amodol ar ganllawiau cydnabyddiaeth y darlledwr comisiynu perthnasol, neu fel arfer ar ddiwedd y cydnabyddiaethau ar flaen rhaglenni, a bydd union ffurf cydnabyddiaeth o'r fath yn unol â Chanllawiau Cydnabyddiaeth y BBC ar gyfer rhaglenni a gomisiynir gan y BBC. [Canllawiau Cydnabyddiaeth y BBC](#).
- (e) Bydd yn adrodd i'r Cynhyrchydd ar bob mater sy'n ymwneud â chynhyrchu'r rhaglen(ni) sy'n dod o dan y telerau hyn (os yw'n briodol), ar yr amod fodd bynnag y gall drafod yn gyfrinachol gyda'r Pennaeth Cynhyrchu neu uwch aelod o adran Adnoddau Dynol BBCSPL, unrhyw faterion sylweddol y maent wedi methu â dod i gytundeb â'r Cynhyrchydd yn eu cylch ar ôl gwneud pob ymdrech resymol.
- (f) O ran yr indemnïad a nodir yn y Contract hwn, ni fyddwch Chi'n atebol mewn perthynas ag unrhyw ddeunyddiau a ddarperir i Chi gan BBCSPL.

### 37. Diogelu Data

37.1 Dehongliad. At ddibenion y Cymal hwn a'r Dogfennau Archebu—

(a) Mae "Cyfraith Diogelu Data" yn golygu—

(i) Deddf Diogelu Data 2018,

(ii) y Rheoliad Cyffredinol ar Ddiogelu Data 2016/679/EU ("GDPR") fel y'i deddfwyd gan y Deyrnas Unedig ("GDPR y DU"),

(iii) GDPR, lle bo hynny'n berthnasol, a

(iv) unrhyw Gyfraith Ddomestig arall sy'n ymwneud â Phrosesu Data Personol o dan y Contract, a

(b) bydd gan y termau “Rheolydd”, “Gwrthrych y Data”, “Cyfraith Ddomestig”, “Sefydliad Rhyngwladol”, “Aelod-wladwriaeth”, “Data Personol”, “Tor Diogelwch Data Personol”, “Prosesu”, “Prosesydd”, “Awdurdod Goruchwyllo”, a “Trydedd Wlad” yr un ystyron ag sydd wedi'u nodi yn y Gyfraith Diogelu Data berthnasol.

37.2. Cyfrannwr fel Rheolydd. Ac eithrio mewn perthynas â'r gwaith Prosesu a nodir yn y Dogfennau Archebu (“Prosesu Penodol”), rydych Chi a BBCSPL yn Rheolyddion annibynnol ac ar wahân, a byddwch Chi'n cydymffurfio â'ch rhwymedigaethau Chi o dan Ddeddfwriaeth Diogelu Data.

37.3. Cyfrannwr fel Prosesydd ar ran BBCSPL. Pan fyddwch Chi'n prosesu data ar ran BBCSPL, byddwch Chi'n Brosesydd ar ran BBCSPL mewn perthynas â Phrosesu Penodol, a bydd Cymalau 37.4 i 37.11 yn berthnasol, fel sy'n ofynnol gan Gyfraith Diogelu Data.

37.4. Cyfarwyddiadau. Dim ond yn unol â chyfarwyddiadau a gofnodwyd gan BBCSPL y byddwch Chi'n ymgymryd â Phrosesu Penodol, fel y bydd y cyfarwyddiadau hynny'n cael eu diwygio o bryd i'w gilydd yn ôl disgrisiwn llwyr BBCSPL, ac eithrio lle —

(a) Mae'n ofynnol i Chi, neu Eich is-broseswyr a/neu asiantau a ganiateir, o dan Gyfraith Ddomestig ymgymryd â Phrosesu Penodol mewn modd arall nag yn unol â chyfarwyddiadau a gofnodwyd gan BBCSPL, neu

(b) yn eich barn resymol Chi, mae cyfarwyddyd BBCSPL yn torri Cyfraith Ddomestig, ac

(c) yn y naill achos neu'r llall, byddwch Chi'n rhoi gwybod i BBCSPL yn brydlon, oni bai fod Cyfraith Ddomestig yn eich gwahardd Chi rhag gwneud hynny.

37.5. Diogelwch. Byddwch Chi'n sicrhau bod Prosesu Penodol yn ddiogel drwy roi mesurau diogelwch technegol a sefydliadol ar waith nad ydynt yn llai llym na'r rhai sydd wedi'u nodi yn adran diogelu gwybodaeth BBCSPL, sydd i'w gweld yn <https://www.bbc.co.uk/supplying/documents/bbc-third-party-information-security-requirements-bbc-data-v1.4.pdf> (“Gofynion Diogelwch Gwybodaeth Trydydd Parti BBCSPL”), y mae BBCSPL wedi'u mabwysiadu, ac fel y bydd BBCSPL yn eu diwygio, yn ôl ei ddisgrisiwn llwyr.

37.6. Cyfrinachedd. Dim ond i bobl sydd o dan eich awdurdod Chi sydd wedi ymrwmo i gyfrinachedd neu sydd o

dan rwymedigaeth statudol briodol o ran cyfrinachedd a dim ond ar sail angen gwybod y byddwch Chi'n rhoi mynediad at y Data Personol sy'n cael ei Brosesu ar ran BBCSPL ("Data Personol Penodol").

37.7. Is-Broseswyr. Mae gennych Chi awdurdod cyffredinol gennym ni i dderbyn gwasanaeth gan Brosesydd arall ("Is-Brosesydd") i ymgymryd â gwaith Prosesu Penodol. Fodd bynnag—

(a) Byddwch Chi'n rhoi gwybod i'r BBC ynglŷn ag unrhyw newidiadau arfaethedig sy'n ymwneud ag ychwanegu neu amnewid Is-Brosesydd, o leiaf 30 diwrnod cyn mynd ati i ychwanegu neu amnewid yn y fath fodd,

(b) Byddwch Chi'n gosod rhwymedigaethau diogelu data sy'n union yr un fath â'r rhai a nodir yn y cymal hwn, neu nad ydynt yn llai llym na'r rheini, ar yr Is-brosesydd drwy gontract, a byddwch Chi'n sicrhau bod copi ar gael i'r BBC ar gais, ac

(c) Byddwch Chi'n gwbl atebol am unrhyw fethiant gan yr Is-Brosesydd i gyflawni ei rwymedigaethau diogelu data.

37.8. Cymorth. Byddwch Chi'n darparu ac yn sicrhau gwybodaeth a chymorth rhesymol yn brydlon, heb gostau i BBCSPL, i alluogi BBCSPL i gyflawni ei rwymedigaethau i wneud y canlynol—

(a) ymateb i geisiadau gan Wrthrychau Data yn unol â'r Gyfraith Diogelu Data,

(b) dangos eich bod Chi (ac unrhyw is-broseswyr a/neu asiantau a ganiateir) yn cydymffurfio â'r cymal hwn, gan gynnwys cadw cofnodion o dan y Gyfraith Diogelu Data berthnasol,

(c) cydymffurfio â rhwymedigaethau eraill sydd wedi'u gosod ar BBCSPL gan Gyfraith Diogelu Data, sy'n cynnwys y canlynol, ond heb fod yn gyfyngedig iddynt—

(i) diogelwch,

(ii) asesiadau o'r effaith ar breifatrwydd; a

(iii) ymgynghoriad, ymchwiliad, archwiliad ac ymholiadau gan Awdurdod Goruchwylio.

37.9. Tor Diogelwch Data Personol. Mewn unrhyw achos o Dor Diogelwch Data Personol neu amheuaeth o hynny sy'n effeithio ar Ddata Personol Penodol ("Digwyddiad Data Personol Perthnasol"), byddwch Chi, heb oedi gormodol, ac o

fewn 24 awr, ar ôl dod yn ymwybodol ohono, yn rhoi gwybod i BBCSPL, gan gynnwys y canlynol yn eich hysbysiad:

- (a) disgrifiad o'r digwyddiad,
- (b) categorïau ac amcan o nifer y Gwrthrychau Data a chofnodion data,
- (c) a gafodd unrhyw Ddata Personol Penodol yr effeithir arno ei ddad-adnabod, ei roi dan ffugenw, ei wneud yn ddienw, neu ei amgryptio,
- (d) enw a manylion cyswllt Eich swyddog diogelu data neu bwynt cyswllt arall mewn perthynas â'r Digwyddiad Data Personol Perthnasol,
- (e) disgrifiad o ganlyniadau tebygol y Digwyddiad Data Personol Perthnasol, ac
- (f) disgrifiad o unrhyw fesurau sydd wedi cael eu cymryd, neu y bwriedir eu cymryd, gennych Chi i fynd i'r afael â'r Digwyddiad Data Personol Perthnasol, gan gynnwys, lle bo hynny'n briodol, mesurau i liniaru ei effeithiau niweidiol posibl.

37.10. Dileu a dychwelyd Data Personol. Ar ddiwedd Eich ymgysylltiad, byddwch Chi'n dychwelyd unrhyw a phob Data Personol Penodol sydd yn eich meddiant neu sydd o dan eich rheolaeth i BBCSPL ac yn dileu copïau presennol oni bai fod Cyfraith Ddomestig yn mynnu fel arall, ac os felly byddwch Chi'n rhoi gwybod i BBCSPL.

37.11. Archwilio ac arolygu. Byddwch yn sicrhau bod BBCSPL yn gallu cael gafael ar unrhyw a'r holl wybodaeth y mae ei hangen arno i ddangos eich bod Chi'n cydymffurfio â'r rhwymedigaethau a nodir mewn Cyfraith Diogelu Data a'r Cymal hwn a chaniatáu cynnal archwiliadau a chyfrannu atynt, gan gynnwys arolygiadau, a gynhelir gan BBCSPL neu archwilydd arall sydd wedi'i orfodi gan BBCSPL.

### **38. Treth Incwm ac Yswiriant Gwladol**

38.1 Gall Ffioedd fod yn ddarostyngedig i'r didyniadau a ganlyn:

- (a) didyniadau mewn perthynas â threth incwm a chyfraniadau yswiriant gwladol y cyflogai sy'n ofynnol yn ôl y gyfraith neu y mae'r BBC yn credu'n rhesymol y mae'n ofynnol iddo eu gwneud yn ôl y gyfraith, gan ystyried canllawiau a gyhoeddwyd gan CThEF
- (b) unrhyw symiau, nad ydynt yn destun anghydfod fel arall, sy'n ddyledus i'r BBC gennych Chi neu o dan gytundeb i ddarparu eich gwasanaethau Chi i'r BBC, p'un a ydynt yn gysylltiedig â'r Contract hwn neu fel arall, ac

(c) unrhyw ddidyniadau y mae'n ofynnol i'r BBC eu gwneud o dan y gyfraith.

38.2 Pan fydd y BBC yn cynnig gwneud unrhyw ddidyniadau yn unol â'r cymal hwn bydd y BBC, i'r graddau y mae'n ymarferol, yn rhoi gwybod i Chi ymlaen llaw ac yn rhoi cyfle rhesymol i Chi herio unrhyw ddidyniad arfaethedig cyn iddo gael ei wneud, a bydd yn ystyried her o'r fath yn ddidwyll cyn gwneud unrhyw benderfyniad. Os bydd y BBC yn gwneud unrhyw ddidyniad y canfyddir yn nes ymlaen ei fod yn anghywir neu'n ddiangen, bydd y BBC yn talu swm i Chi sy'n cyfateb i ddidyniad o'r fath yn llawn fel dyled, ynghyd â llog ar y gyfradd llog taliadau hwyr berthnasol ar gyfer treth incwm y DU o'r dyddiad y gwnaed y didyniad tan y dyddiad talu.

38.3 Os byddwch Chi yn hysbysu'r BBC bod asiantaeth yn eich cynrychioli Chi, rydych Chi drwy hyn yn awdurdodi'r BBC i dalu'r holl arian sy'n ddyledus o dan y Contract hwn i'r asiantaeth honno ac ni fydd gan y BBC unrhyw atebolrwydd pellach i Chi mewn perthynas ag unrhyw arian a dalwyd felly.

### **39. Didyniadau**

39.1 Gall BBCSPL ddidynnu o'r Ffi unrhyw symiau, nad ydynt yn destun anghydfod fel arall, sy'n ddyledus gennych Chi i BBCSPL neu o dan gytundeb i ddarparu cyfraniadau neu wasanaethau, boed yn gysylltiedig â'r Contract hwn neu fel arall.

39.2 Os yw'n ofynnol i BBCSPL, yn unol ag unrhyw ddeddf, rheol neu reoliad perthnasol yn awr neu yn y dyfodol ar unrhyw gorff llywodraethol neu weinyddol arall cymwys, ddidynnu neu gadw arian yn ôl o unrhyw swm neu symiau, mewn perthynas â threth neu fel arall, sy'n daladwy i Chi yn unol â'r Contract, bydd BBCSPL:

- (a) yn meddu ar hawl i dalu'r swm neu'r symiau dan sylw ar ôl didynnu'r swm hwnnw sy'n cael ei gadw'n ôl neu ei ddidynnu;
- (b) yn talu'n brydlon i'r awdurdod perthnasol o fewn y cyfnod a ganiateir gan y gyfraith y swm hwnnw sy'n cael ei gadw'n ôl neu ei ddidynnu; ac
- (c) yn darparu tystiolaeth ysgrifenedig i Chi ei fod wedi gwneud y taliad i'r awdurdod perthnasol.
- (d) Os na fydd BBCSPL yn cadw'n ôl neu'n didynnu'r swm hwnnw, byddwch Chi'n talu pob ac unrhyw dreth a thâl arall sy'n daladwy oherwydd y symiau hynny a byddwch Chi'n indemnio ac yn cytuno i gadw BBCSPL wedi'i indemnio'n llawn rhag ac yn erbyn unrhyw atebolrwydd neu draul mewn cysylltiad â chadw'n ôl neu ddidynnu'r swm hwnnw.

39.3 At y dibenion hyn, bydd symiau mewn arian cyfred ar wahân i Sterling yn cael eu trosi ar y gyfradd gyfnewid a ddarperir i BBCSPL gan Bloomberg bob mis.

39.4 Os daw BBCSPL i'r casgliad ei fod wedi methu â didynnu swm o daliad y gallai fod wedi ei ddidynnu yn unol â'r cymal hwn, rydych Chi'n cytuno y bydd ganddo hawl i ddidynnu'r swm hwnnw o unrhyw daliad pellach a wneir i Chi mewn cysylltiad â'r Contract hwn, gan gynnwys drwy wrthgyfrif symiau sy'n ddyledus ganddo ac iddo. Ni fydd arfer hawliau BBCSPL o dan y cymal hwn yn cyfyngu nac yn atal arfer neu arfer pellach o hawliau o'r fath nac unrhyw hawl neu ddatrysiad arall a allai fod gan BBCSPL.

#### **40. Cytundeb Cyflawn**

40.1 Bydd y Contract hwn bob amser yn drech na'r holl delerau ac amodau eraill y gallech Chi honni eu bod yn berthnasol. Dim ond drwy gytundeb ysgrifenedig ymlaen llaw rhwng y partïon y gellir diwygio'r Contract hwn.

40.2 Ac eithrio mewn perthynas â chamliwio twyllodrus, mae'r Contract hwn yn sefydlu dealltwriaeth lwyr y partïon mewn perthynas â'r Archeb ac yn disodli'r holl gytundebau, negodiadau a thrafodaethau blaenorol rhwng y partïon. Mae unrhyw atodlenni yn rhan o'r Contract hwn.

#### **41. Terfynu**

41.1 Ac eithrio'r rolau canlynol: Cyfarwyddwyr, Cynhyrchwyr a Chynhyrchwyr/Cyfarwyddwyr Teledu a Radio, gall BBCSPL derfynu'r Contract hwn ar unwaith gan dalu am y gwasanaethau a ddarparwyd tan y dyddiad terfynu os:

- (a) bydd gwasanaethau'n cael eu hatal oherwydd force majeure (gan gynnwys salwch ardystiedig neu analluogrwydd corfforol sy'n golygu nad ydych Chi'n gallu darparu'r gwasanaethau);
- (b) byddwch Chi'n torri amodau unrhyw un o ddarpariaethau'r Contract ac:
  - (os oes modd unioni'r tor-amod) na fyddwch Chi yn ei unioni cyn pen saith (7) diwrnod (neu gyfnod byrrach y byddai'n rhesymol i BBCSPL ofyn amdano) ar ôl cael hysbysiad ysgrifenedig yn nodi'r tor-amod ac yn mynnu ei fod yn cael ei unioni; neu
  - nad oes modd unioni'r tor-amod; neu
  - bod y tor-amod yn un sylweddol neu'n torri amod arwyddocaol;
- (c) byddwch Chi'n torri amodau dro ar ôl tro neu os na fyddwch Chi yn cadw at unrhyw un o delerau ac amodau'r Contract hwn;
- (d) Os yw canlyniadau unrhyw archwiliad meddygol a gynhaliwyd o dan gymal 11 (lechyd) uchod yn golygu na all BBCSPL gael yswiriant cynhyrchu ar delerau sy'n dderbyniol i BBCSPL;
- (e) na fyddwch Chi'n derbyn gwiriad DBS neu'n ymaelodi â chynllun PVG, pa un bynnag sy'n berthnasol (pan fydd hyn yn ofynnol er mwyn darparu'r gwasanaethau);

- (f) byddwch Chi'n dioddef digwyddiad ansolfedd o dan unrhyw ddeddf sy'n ymwneud â methdaliad, ansolfedd neu ryddhad dyledwyr unrhyw le yn y byd;
- (g) Nid oes modd i Chi ddarparu'r gwasanaethau am unrhyw reswm.

41.2 Ac eithrio'r rolau canlynol: Cyfarwyddwyr, Cynhyrchwyr a Chynhyrchwyr/Cyfarwyddwyr Teledu a Radio, os bydd eich Archeb yn cael ei therfynu am unrhyw reswm ariannol, golygyddol neu unrhyw reswm arwyddocaol arall, byddwch Chi'n cael eich talu am y gwaith sydd wedi cael ei wneud hyd y dyddiad terfynu a bydd y BBC naill ai:

- (a) Yn rhoi rhybudd terfynu o 24 awr i Chi os ydych Chi'n cael eich talu ar sail Talu Wrth Ennill
- (b) Yn gwneud taliad i Chi sy'n cyfateb i daliad wythnos o weddill yr archeb, pa un bynnag yw'r lleiaf os ydych Chi'n cael eich talu ar sail gros.

41.3 Ar gyfer Cyfarwyddwyr, Cynhyrchwyr a Chynhyrchwyr/Cyfarwyddwyr Teledu a Radio, gall BBCSPL derfynu archeb ar unwaith gan dalu am y gwasanaethau a ddarparwyd tan y dyddiad terfynu os:

- (a) byddwch Chi'n torri Eich rhwymedigaethau'n sylweddol ac nad oes modd eu hunioni
- (b) byddwch Chi'n torri amodau unrhyw un o ddarpariaethau'r Contract ac:
  - (os oes modd unioni'r tor-amod) na fyddwch Chi yn ei unioni cyn pen saith (7) diwrnod (neu gyfnod byrrach y byddai'n rhesymol i BBCSPL ofyn amdano) ar ôl cael hysbysiad ysgrifenedig yn nodi'r tor-amod ac yn mynnu ei fod yn cael ei unioni; neu
  - nad oes modd unioni'r tor-amod; neu
  - bod y tor-amod yn un sylweddol neu'n torri amod arwyddocaol;
- (c) mae rhesymau y tu hwnt i'w reolaeth resymol yn atal yr ymrwymiad rhag parhau
- (d) Nid oes modd i Chi ddarparu'r gwasanaethau am unrhyw reswm

41.4 Ar gyfer Cyfarwyddwyr, Cynhyrchwyr a Chynhyrchwyr/Cyfarwyddwyr Teledu a Radio, os terfynir archeb am unrhyw reswm heblaw a-d uchod, mae gennych Chi hawl i dderbyn y ffi lawn a nodir yn Eich archeb sy'n parhau i fod heb ei thalu ar y dyddiad terfynu, yn amodol ar ystyried y ddyletswydd arferol i liniaru colled.

41.5 Ni waeth beth yw'r rôl, os ydych Chi i fod i gael/neu wedi cael taliad yn unol â'r cymal hwn ("taliad"), ond eich bod Chi wedi trefnu i weithio gyda BBCSPL a/neu unrhyw gwmni cysylltiedig yn ystod yr un cyfnod ag y byddech Chi i fod i gael/wedi cael

taliad yn iawndal am yr archeb flaenorol, yna nid yw'r taliad yn daladwy.

41.6 Mae'n ofynnol i chi ddatgelu hyn i BBCSPL a thalu unrhyw daliad a wnaed yn ôl. Os daw BBCSPL yn ymwybodol eich bod Chi wedi torri hyn, mae'n cadw'r hawl i naill ai fynnu bod y taliad yn cael ei ad-dalu ar unwaith a/neu derfynu'r archeb ar unwaith a pheidio â thalu.

41.7 Pan fydd archeb yn dod i ben, rydych chi'n cytuno y byddwch chi'n dychwelyd holl eiddo BBCSPL, o ba bynnag fath, gan gynnwys cardiau adnabod neu drwyddedau mynediad i safleoedd BBCSPL, i'ch archebwr/rheolwr, ni waeth beth fo'r amgylchiadau a arweiniodd at derfynu neu ddod â'r archeb i ben.

## **42. Cyfraith lywodraethol**

42.1 Caiff y Cytundeb hwn ei lywodraethu a'i ddehongli yn unol â chyfreithiau Cymru a Lloegr ac mae pob parti'n ildio i awdurdodaeth benodol Llysoedd Cymru a Lloegr.